

Allakkerineq pillugu Inatsisartut inatsisissaattut siunnersuut
(Ineqarnermut, Attaveqarnermut Angallannernullu Naalakkersuisoq)

Saqqummiussissut
Siullermeerneqarnera

Matumuuna Naalakkersuisut sinnerlugit allakkerineq pillugu Inatsisartut inatsisissaattut siunnersuut saqqummiuppara.

Inatsisissatut siunnersuutip saqqummiunneqarnerani Kalaallit Nunaanni allakkerinermut, tassungalu ilanngullugu POST Greenlandip sulineranut maleruagassat maannakkut atuuttut nutarterneqarnissaannik kissaateqarneq tunngavigineqarpoq. Allakkerineq pillugu Inatsisartut peqqussutaat kingulleq 2004-mi akuerineqarmalli, allakkanik siaruarterinermik niueruteqarneq sukkasuumik allanngoriartorsimavoq.

Ukiut kingulliit ingerlanerini allakkat poortukkallu nassiunneqartartut ikileriarujussuarsimapput, tamannalu ingerlaannartussaavoq. Atortut elektroniskiusut atorlugit allatarneq allagaannaallu saniatigut qinigassanik allanik atuisarneq tamatumunnga pissutaasut ilagaat. Allakkat nassiunneqartartut ikiliartornerat sumi tamani atuuppoq, taamatuttaarlu danskit savalimmiormiullu allakkeriviini atuulluni.

Inatsimmi maannakkut atuuttumi ingerlaavartumik, allakkerinermik niueruteqarnermi piumasaqaatinik kiisalu POST Greenlandip sulineranik piffissamut naleqqunnerulersitsisinnaasunik iluarsisarnissat periarfissaqartinneqanngillat. Taamaattumik allakkerineq pillugu Inatsisartut inatsisissaannik, tassungalu atatillugu nalunaarusiamik nutaamik suliaqarnissaq pisariaqarsimavoq.

Siunnersuuteqarnermi inatsisit atuuttut eqaannerulernissaat allannguinnissamullu piareerneqarnissaat anguniarneqarpoq. Siunnersuutip atuutilerneratigut POST Greenlandip sullissinermini tunngaviusumi tunniussinnaasai allanngortinneqassanngillat, kisiannili nalunaarusiornikkut sullissinerit taakku imaasa ersarinnerusumik aalajangersarneqarnissaat, kiisalu allakkerinermi sullissinerit ataatsimoortillugit maleruagassiuunneqarnissaat Naalakkersuisunut suliakkiissutigineqarpoq. Inatsimmik tunngavissamik, kisermaassisussaataitaaneq angallassisussaataitaanerlu naapertorlugit piginnaatitsinerit allassimaffigisaannik peqalernissamik kissaateqarneq tunngavigineqarpoq, taakkulu nalunaarusiamut kattunneqassapput, tassanilu kisermaassisussaataitanermut ataatsimut maleruagassat kiisalu angallassisussaataitanermut piumasaqaatit ersarinnerusut allassimassapput.

Siunnersuummi sullissinerit piffissamut naleqqukkunnaartut imaluunniit aningaasaqarnikkut iluanaarutaasinnaajunnaartut POST Greenlandip tuniniagaanit peerneqarsinnaanissaannik Naalakkersuisut aalajangiisinnalernissaat periarfissinneqarpoq. Tamatuma saniatigut sullissinerimi iluarsisinnalernissaq siunnersuummi periarfissinneqarpoq. Oqaatigineqassaaq, siunnersuut kinguneqarluartumik tusarniaassutigineqarsimammat, tassanilu

tusarniaaffigineqartut allakkerinermut inatsit nalunaarullu ataqatigiissillugit misissornissaannut periarfissaqartinneqarput, taamaattumillu annertunerusumik oqaaseqarnissaq tunngavissaqarsimanani. Tamatumunnga atatillugu inatsisissatut siunnersuut tassungalu nassuiaatit innersuussutigissavakka.

Taamatut oqaaseqarlunga siunnersuut Inatsisartuni kajumittumik suliarisassanngorlugu tunniuppara.